

30 OCT 2003

Mahathir-Pertanian

SEKTOR PERTANIAN DIPERGIATKAN SEMULA SUPAYA LEBIH DINAMIK, KATA PM

KUALA LUMPUR, 30 Okt (Bernama) -- Malaysia akan terus menggiatkan usaha menjadikan sektor pertanian sebagai sektor penting dalam menjana ekonomi negara setelah sektor itu berkembang 1.5 peratus berikutan peningkatan keluaran kelapa sawit dan komoditi makanan dalam tempoh kajian semula Rancangan Malaysia Kelapan (RM-8) 2001-2005, kata Perdana Menteri hari ini.

Datuk Seri Dr Mahathir Mohamad berkata hasil eksport pertanian meningkat sebanyak 26 peratus dari RM23 bilion pada tahun 2000 kepada RM29 bilion pada tahun 2003, disumbang oleh kenaikan harga komoditi utama dan makanan.

Menurut Dr Mahathir eksport barangan makanan yang lebih baik adalah kesan daripada peningkatan pelaburan dalam pengeluaran makanan berskala besar dan pembaikan kualiti yang dicapai dalam konteks pendekatan MOA Incorporated.

"Dalam tempoh dua tahun yang akan datang, sektor pertanian dijangka berkembang lebih tinggi pada kadar 2.7 peratus setahun. Pertumbuhan sektor ini akan disumbang oleh peningkatan kenaikan keluaran tanaman industri, pengeluaran makanan dan sumbangan daripada aktiviti pertanian yang baru," katanya ketika membenteng laporan kajian separuh penggal RM-8 di Dewan Rakyat, sehari sebelum persaraannya sebagai Perdana Menteri, jawatan yang disandang selama 22 tahun.

Perdana Menteri berkata sementara negara belum lagi dapat beralih kedudukannya sebagai pengimport bersih makanan, negara telah berjaya mencapai tahap sara diri bagi bekalan ayam, itik dan telur serta hampir mencapai tahap sara diri bagi keluaran perikanan.

Dr Mahathir berkata kerajaan telah mengenal pasti penternakan ikan atau akuakultur mempunyai potensi pertumbuhan besar.

"Kerajaan akan mempergiatkan usaha untuk membangunkan infrastruktur baru, meningkatkan kemahiran dan teknologi bagi memajukan akuakultur yang moden. Ini melibatkan pembiakan pelbagai jenis ikan dan krustasia yang boleh dipasarkan dalam dan luar negara," katanya.

Untuk tujuan itu, Dr Mahathir berkata kerajaan akan mempercepatkan perlaksanaan Program Benih Negara dan Pelan Tindakan Pembangunan Penetasan.

Di samping itu, beliau berkata kerajaan akan menyediakan perkhidmatan sokongan bagi menggalakkan pelaburan dalam industri ikan tuna melalui penubuhan empat Pusat Pembangunan Tuna Serantau di Johor, Pulau Pinang, Sabah dan Labuan.

Perdana Menteri berkata kerajaan juga akan mempergiatkan usaha untuk membangunkan potensi barangan biomassa dan bioteknologi dalam pasaran dalam negeri dan eksport. Program untuk membangunkan produk semula jadi yang khusus dan komersial akan juga dipercepatkan.

Di samping itu, Dr Mahathir berkata projek Taman Botani Negara akan dibangunkan sebagai contoh bagi peluang pelaburan baru dalam sektor pertanian selain dijadikan sebagai tempat rekreasi dan tarikan pelancong.

Bagi memantap serta menggiatkan lagi pembangunan dalam sektor pertanian supaya lebih dinamik, Perdana Menteri berkata teknologi sokongan yang lebih berkesan akan digalakkan.

Jelasnya, antara inisiatif baru itu ialah penggunaan secara lebih meluas teknologi komunikasi dan maklumat (ICT) dan e-dagang. Untuk itu, projek pertanian berasaskan Teknologi Industri-Kerajaan bagi Revolusi e-Ekonomi atau AgriTiger yang bertujuan meningkatkan produktiviti dan daya saing dalam sektor pertanian, akan diperluaskan ke tempat lain termasuk

Sabah dan Sarawak, kata Dr Mahathir.

Menerusi AgriTiger, Perdana Menteri berkata aplikasi pengurusan rantai antara perniagaan yang berkos efektif dan gerbang elektronik yang dinamakan Agribazaar akan dimajukan lagi dan akan berfungsi sebagai pintu pertukaran antara masyarakat tani dan peniaga untuk menjalankan urusan niaga secara dalam talian.

Dr Mahathir juga berkata kerajaan sedang berusaha membangunkan negara menjadi pengeksport makanan yang berdaya saing, selain usaha sedia ada bagi mengekalkan daya saing Malaysia sebagai pengeluar minyak kelapa sawit berbanding minyak dan lemak lain di pasaran dunia.

Pada masa yang sama, Perdana Menteri berkata bagi memastikan sektor ini memiliki tenaga kerja pengurusan dan teknologi yang dinamik, golongan profesional dan usahawan akan dilatih dengan amalan dan kemahiran pertanian moden.

Untuk mencapai hasrat tersebut, Dr Mahathir berkata Pusat Latihan Pertanian Negara akan dipertanggungjawabkan untuk merancang, menyelaras dan membekal program latihan dan kemahiran.

-- BERNAMA
RBZ MFJ LAT